



**Disquisitio Critica In Georgii Christophori Neller JCti
Trevirensis De Tribus Episcopis, S. Petri Etiamnum
Viventis In Romana Cathedra Successoribus, Systema
Novum, Uti Et Primatum Pontificium S.**

Berg, Hyacinth

Coloniæ Agrippinæ, 1772

Pars Secunda.

[urn:nbn:de:hbz:466:1-61433](https://nbn-resolving.de/urn:nbn:de:hbz:466:1-61433)

graphis ex parte dissentientibus, permissa fuit; LINUM primo, multoque magis CLETUM, atque CLEMENTEM nonnisi a PETRI obitu successisse.

P A R S S E C U N D A.

§. XIV. **U**t incertus redderetur primatus Pontificius S. CLEMENTIS I., tertii post D. PETRUM asserti Romanorum Episcopi, opportune Systema ipsum præmittebatur, primatus hanc dignitatem detrahens LINO atque CLETO, utpore defunctis, PETRO adhuc vivente, ac retinente illam, Urbis Romæ Episcopis. Poterat lis tertio intentata Successori audax alioquin nimium, ac vix toleranda videri, si duorum excluso Papatu, qui Romanam rexissent Ecclesiam, veri illius atque *omni cum rigore* Episcopi, Papatus insuper tertii vel possessionem amitteret suam vel possessionis saltem istius certitudine dejiceretur. Præmisso autem Systemate tolerabilius hæc res fiebat, eo quod iam appareret duorum cum Episcopatu Primatum haud sociari posse, PETRO, quoad viveret, semper existente *Universalis Ecclesiæ Primate*; unius autem ordine quidem tertii a PETRO, attamen primi post ejus obitum Romani Episcopi, Papalem in jus trahere dignitatem eo ferri posset facilius, quo speciosior aliter opinandi, vel aliquantum hæsitandi ratio legentium sub conspectum adduceretur. Bene habet. Videamus, quid VIRUM CLARISSIMUM hæsitare coegerit, si non etiam contrariam plane in opinionem distraxit. Suis ille verbis loquatur.

" Cùm ergo juxta nos Ss. *Linus & Cletus* (utpotè vivente adhuc Petro defuncti Romani Episcopi) non essent *Caput totius Ecclesiæ*, sed *solum Episcopi Rome*, fuitne saltem S. Clemens secundus *totius Ecclesiæ Primas*; quia S. Petro superstes? Ex. Pro certo non aū sim hoc adstruere; quoniam hæc tenus sufficiens ratio allata non fuit, quod is, qui successit Petro in *Episcopatu Romano*, eidem quoque *ipso jure & fine* quovis alio requisito, *successisset in Primatu, seu Praefecturâ totius Ecclesiæ.*" (a)

Ob-

(a) §. IX. pag. 43.

Obtentis oppido speciosus ! tanquam si, ut certus habeatur Primatus Pontificius S. CLEMENTIS, ea fuerit afferenda ratio, quae ex VIRI CLARISSIMI decernat Systemate, atque hoc debeat monstrare, illum, qui viventi successit PETRO in Episcopatu Romano, *jus* quoque adeptum fuisse, ut sublatu e vivis PETRO, hoc ipso, & *sine* quovis alio requisito succederet in Primatu. Imo vero haec allata hactenus ratio non fuit, nedum sufficiens : quoniam nondum apparuerat Systema ipsum ex solius cerebri fecunditate, qua VIR CLARISSIMUS pollet, protrusum ; nondum hoc creditum, e Catholicis fore praesertim in Augusta TREVIRORUM urbe Doctoribus, qui PETRI Episcopatum Romanum non iisdem, quibus ex illo addito vixit, annis circumscriberet ; qui pro Vicariis Episcopis ab HENSCHENIO, & PAPEBROCHIO assertis, totidem atque *omni cum rigore proprios* Urbis Romæ Episcopos PETRO, solum jam suum retinenti Primum, subjungeret ; qui rem adeo paradoxam, atque nescio, an ulla hactenus Catholica in Universitate auditam, publicis evulgaret Thesis, veterumque ex dictis, ac Venerabilium Patrum authoritate, si Superis placet, firmandam, collustrandamque susciperet. Sed neque nunc istam proferre rationem necesse erit, posteaquam Systema ipsum nulla nisi ratione ostensum fuit.

De cætero autem duo sunt, quæ certum omnino reddant, ac cuius Catholicon liti subducere debeant Primum Pontificium S. CLEMENTIS. Unum : Historicorum omnium, quibus sit tribuenda fides, consensio, dum & CLEMENTEM istum in Romana PETRI Sede collocant, Episcopum haud dubie legitimum, & eam post PETRI obitum tenuisse agnoscent. Alterum hujus certitudo *Theorematis* : eos ad unum omnes, qui post PETRI obitum Romanam tenuere Cathedram, si modo legitima concendiissent via, neque haec ipsa in dubitationem cadat, etiam Primum in D. PETRO institutum gessisse. Certitudinem vero hanc praestat totius antiquitatis consensio, quanta possit esse maxima : praestat veneranda tot Conciliorum sive universaliuum, sive particularium authoritas ; praestat vox una in hoc Theologorum, ac concentus Scholarum omnium, ut ut alias Systematis ac singularibus opinionibus invicem discrepantium ; praestat fidelium communis illa neque interrupta per decursum tot sæculorum persuasio :

sio : frustraque ego sum, ac multum præfixos a me hujus disquisitio-
nis limites egrediar, si integrum hisce ex fontibus aliquam, dige-
stamque demonstrationem afferre velim, quam cernere est in tot eru-
ditissimis Dissertationibus, imo & libris integris illo super argumento
vulgatis ; quibus quidem, quod opponat, adversa excogitare pars
(Nam quid adeo tutum, sanctumque, ut exceptionem aduersus se nul-
lam habuerit) quod autem enervet, quod vim adimatur demonstrationis,
invenire non possit. Jam vero ex *Theoremate*, & altera ei subjuncta
propositione *historice* certa, hic conficitur Syllogismus : *Quotquot a*
PETRI obitu Romanam tenuere Cathedram Episcopi baud dubie legiti-
mi, iidem & gessere Primum. CLEMENS I. ex iis unus est, qui a
PETRI morte &c. igitur & gessit Primum. Consequentiam præ-
missis datis, nemo, qui concludere novit, respuerit. *Minori* nihil op-
ponit CLARISSIMUS, atque vehementer me fallo, nisi & ipsi certa
fuerit. Solam contra Majorem hoc poterit excipere, eam, si universo
prorsus atque ullam citra limitationem capiatur, non videri usquequa-
que certam, ob *requisitum* aliquod, quod an adfuerit in primo illo post
Petri obitum Successore, fors & in nonnullis aliis, liquido definiri
non possit. Videbo de hoc postea. Observo autem in præsens : uti
unica birundo non facit ver, sic neque ejus ad *Doctoratum Theologicum*
admissi (b) dispar solius sententia concentui tot Doctorum, quorum
alii in fide *Divisa credibilium*, alii usque adeo in *credendorum* numero
Theorema illud reponunt, quorumque nemo est, quin certum illud
habeat, nullique apud nos controversiae subjectum, præponderare de-
bet. Sæpe unius, alteriusve non curatur dissensio PATRIS, consen-
tiente reliquorum PATRUM choro, neque incertum id redditur,
quod a pluribus, ac prope omnibus judicatum fuerit. Minus igitur
curandum, siquid unus & *admissus* tantum ad *Doctoratum Theologicum*
dixerit, senseritque contra universos; nedum ut universorum senten-
tiā hac ratione incertam fieri existimemus. Atque vel solum istud
mihi sufficere poterat, ut ostenderem, quam imbecilla prorsus, inani-
que ductus causa VIR CLARISSIMUS Primum Pontificium S. CLE-
MENTIS I. in jus trahi, ac certitudine saltem sua multari posse con-
fide-

(b) *Est hic unus ex Titulis VIRI CLARISSIMI: qua vero in Acad-
mia illum sit consecutus, ignoro.*

sideret. Quoniam tamen non hoc solum ipse voluit; quoniam *plus significavit, quam dixit*; quoniam assumptum a me Critæ officium accuratiorem quandam eorum, quæ aut dixit ipse, aut significare voluit, discussionem exposcit; ea quoque, quæ in *asterisco*, ac triplici continentur *additione*, percurrere nonnihil debebo; & quam vel apte producta, vel solida illa sint, quæ producta fuere; quorsum denique tendant, Lectoris ad hæc cognoscendum aviditati exponere.

§. XV. Sequamur itaque **VIRUM CLARISSIMUM**: "Vis hoc ex præcepto Christi ceu *jus divinum* derivare, habebis contra te Catholicos, & ex Treviris duos *Nicolaos*, *Cusanum Cardin.*, & *Honthemium Suffraganeum*, qui negarunt, & negant, *jure divino* annexum esse Romanæ Catdedræ Primatum Ecclesiæ Catholicæ. Vis *ex jure humano*? ubinam istud jam fuit *tempore S. Clementis*? ubi canon? ubi mos? Vis *ex facto S. Petri*? ecquod istud? an fundatio, & instructio Ecclesiæ Romanæ? an mortis ibidem perpessio? an, quia primus Urbis Episcopus fuit simul Apostolorum, & omnium fidelium Caput à Christo constitutus? Cave, ne hic aut fallaciam æquivationis committas in syllogismo, aut id supponas, quod est in questione." (c)

Pol! quantus ille apparatus interrogationum! sed venit ad me quoque interrogandi ordo. *Quem hic alloqueris, VIR CLARISSIME?* Mene, qui regione sum Trevir, & ut pueri uno saepè terroristur *Nicolaio*, si quem forte conspiciunt, vel adversum experiuntur, sic ad minimum terrori putes duobus? Suspicio enim mihi est, multisque fundata modis, me esse, quem impetas. Sed quis iste ludus est? quis ab usus Venerandi amborum nominis **CUSANI**, atque **HONTHEMII**, dum comparantur iis *Nicolaorum* larvis, quæ fronte caperata, trucibus, minacibusque oculis, prolixa barba, ac tonitru quodam verborum innocuae sunt terriculamenta ætatis? Aut an forte ad etymon aludebas *Nicolai*, quod & *victorem populi* significare possit; tanquam si imbelli vulgus haberi debeat gens illa Theologorum, quæ aliam hac in materia opinionem, quam quæ hisce duobus placuisse Viris, se Etata fuerit? Vide, ne non laus ista sit, sed assentatio mera, qua nec

H

alter

(c) §. IX. sub asterisco pag. 43.

alter delectetur in ccelis, alterque excelsioris animi sit, quam ut ea pascatur in terris. Cæterum Uterque hic mihi NICOLAUS maximo est in pretio, tanquam qui unus fuerit, sitque etiamnum post mortem; alter & fuerit iamtum, sitque adhuc, ac futurus post fata sit Patriæ meæ non vulgare decus, & ornamentum. Neque tamen vel unius, vel alterius, vel etiam amborum conjuncta me retinebit authoritas, quo minus id sentire pergam, quod sensi, cohesionem Primatus cum Episcopatu Romano esse *Divini Juris*. Nam cur cœlum ita sensisse me aliquando, atque illam etiamnum menti meæ arridere sententiam? Et refragari quidem huic CUSANUM, locumque ubi refragetur, scio. HONTHEMIUM tamen contra me stare nescivi. Vellemq[ue], tu produxisses locum sive ex *Trevirorum Historia Diplomatica*, quæ celebre adeo ac nunquam intermoriturum reddidit HONTHEMII nomen; sive ex *Prodromo ad Historiam Trevirensem dogmaticam & pragmaticam*; sive ex alio ejus, quod hucusque non viderim, opere; sive demum ex Thesibus Præside quondam ILLUSTRISSIMO hoc VIRO, qui & TREVIRIS Ipse ante annos amplius quadraginta Jurium Professorem egit, in lucem datis, ubi dissensio ista, apertisque contineretur verbis, ut tanto magis de illa certus redderer. Nisi forte priuatis in congressibus, sermonibusque hanc Ille Tibi mentem suam aperuerit. Quoquo modo se res habeat: novi modestiam HONTHEMII, novi æquitatem animi; quin & humanitatem ab eo singularem me experiri meinini, cum annis abhinc decem & sex ad familiare admittebat alloquium, in quo multa fuit, jucundaque de rebus ad eruditionem pertinentibus sermocinatio. Quamvis igitur sim regione Trevir, non id Ille vitio vertet populari suo, si in ea, quæ circa istud thema est, sentiendi libertate, & argumentis ita ferentibus, vincentibusque, in oppositam Ipsi partem concessero.

§. XVI. Redeo ad te, qui tantisper me divertebas. Quæris: Vis HOC &c. Quæro vicissim ego: adeone stolidum me fore censes, ut HOC, quodque totum est *falsi suppositi*, eo quod nemo viventi Petro successorit, proinde nec juris quidquam ad Primatum ista ex successione adeptus fuerit, demonstrem tibi ex *præcepto Christi*, quod solos juxta me illos respicit, qui PETRO Episcopatum simul & Primatum deponenti nonnisi post ejus mortem succederent? Dicam amplius:

plius: quamvis certa mihi res sit, conjuncta hæsisse semper, ex quo PETRUS diem suum obiit, hæc duo, Episcopatum scilicet Romanum, atque Præmatum; absit tamen, ut, conjunctionem ipsam si demonstrare velim, ad originem ejus incertam, *Jus videlicet Divinum*, quamvis juxta me hæc re ipsa origo sit, recurrendum putem. Non ita processi in dictatis meis, hæc forte si habuisti, aut alias extitit, qui ex iis excerpta transmitteret. Conjunctionem hæc certam faciunt, quæ retuli §. XIV. atque ex talibus eam stabilivi. Verbo *authoritas* illam, nec controversa, sed plane evidens, certam reddidit. Id potius ego feci, ut præmissis certis, incerta ac controversa, quæ tamen verisimilem cum prioribus nexus haberent, concludenda ducerem. Sciebam quippe ex incerto nullum certum effici consequens. Sciebam simul, ex certo, ubi applicatio accederet verosimilis, verosimile aliquid inferri posse. Atque utinam hanc Tu secutus es methodum, ac verosimiliter Patrum dicta, quæ citabas §. V. in rem tuam vertisses, non illud Systematis portentum, quod MAGNI OPINATORIS AC DIVINATORIS, si non SOMNIATORIS potius tam juste Tibi titulum accersit, e *sinu facultatis tuæ imaginatricis* proditurum fuit. (d) Quid ergo feci? Ex perpetua, atque ad hoc usque tempus non interrupta conjunctione partim a Patribus, partim a Conciliis asserta ac definita *Jus Divinum* velut illius originem, non autem ex origine ista, quam Catholicorum scio controversias subjacere, vel conjunctionem ipsam, vel conjunctionis perpetuitatem deduxi, quamvis necessitatem, & immutabilitatem, quam apprime distingui necesse est, recte inde, non tamen *apodeictice*, mihi conclusisse videar. Atque hæc cum protuli, cæteris in illo quæstionum apparatu contentis, quæque non ferunt me, supersedere possum: quoniam si nihil ad ea respondero, etiam id, quod satis est.

§ XVII. Pergit sciscitari VIR CLARISSIMUS: "Mortuo S. Petro, dic., ad quem pertinuit, toti Ecclesiæ, per orbem diffusæ, porróque diffundendæ præficere Caput juxta formam, quam ei Christus dedit constituendo Apostolorum Caput S. Petrum? an ad solam Ro-

H 2

mæ

(d) *Jure retorsionis utor. Videatur P.I. §. V.*

" mæ Ecclesiam ? unde ? an ad omnem Ecclesiarum collectionem ?
" Num hæc sibi præfecit Clementem ? " (e)

Talia sciscitanti hoc primum reponi potest : inhærcere ipsum præconcepto Systemati de Successione illa CLEMENTIS in Episcopatu superstitio etiamnum in vivis PETRO ; quod quam male materiaum fuerit, ac ne verosimile quidem ab ipso redditum, necesse non est repetere. Gratis etiam permitta illa successione, est, quod dici possit, ac debeat, videlicet non fuisse opus, ut vel *sola Romæ Ecclesia*, vel *Ecclesiarum omnium collectio* de CLEMENTE Capite sibi constituen- do laboraret. Si PETRUS vivus Illum Sibi Successorem dare potuit in Episcopatu, solo retento *Apostolatus Primatu* ; si hoc potuit LINO usque adeo, CLETO que jam vita functis, undecunque hæc PE- TRO potestas fuerit ; potuit Eum etiam *Coadjutorem* adsciscere Pri- matus sui, & adscivisse credendus est pleno cum succedendi jure, quæcunque in PETRO hujus sit potestatis origo. Coadjutor autem hu- jusmodi nova non indiget designatione, sed ipso, quod acquisivit, jure in defuncti locum immittitur. Taceo hoc minus recte, aut fal- tem seposito verborum rigore quæri : ad quem pertineat PRÆFICE- RE. Vin' scire, istud ad quem pertineat ? Non ad *solan Romæ Ec- clesiam* ; non ad *Ecclesiarum omnium collectionem* ; imo nec ad PE- TRUM ipsum. Præficere est potestatem dare ; & potestatem Capitis CHRISTO in terris Vicarii nemo dat, nisi CHRISTUS Ipse, etsi nominationem ab hominibus ejus patiatur fieri personæ, cui potesta- tem illam attribuat.

Reponi potest secundo, & juxta Systema verum, in quo nullum PETRUS Successorem habuit ne in Cathedra quidem Romana, quoad *in vivis* ageret : si, PETRO mortuo, sola Romæ Ecclesia Episcopum sibi feligere potuit (& nunquid id potuisse dices, si tunc nullus existeret ?) feligendi quoque universæ Ecclesiæ Primatem suum facultas illi fuit, quin aliarum ad hoc opus esset concursu Ecclesiarum. Si au- tem quæritur : Unde ? Responsum non tibi dabitur : non quia nul- lum dari potest ; sed quia non tale, quod certitudinis attingat gradum. Insinuavi jam satis, répetamque, incertum esse modum illum, quo col-

(e) §. IX. sub asterisco pag. 43.

colligata invicem fuerint Episcopatus Romanus, & Supremi Episcopi,
CHRISTIque in terris vices agentis dignitas, nisi quod sublato e
vivis PETRO, qui eadem ambo tenuit, semper colligata hæc esse cer
tissimum haberi debeat. Nunquid omnes concedimus, quæstionem
AN a quæstione QUOMODO secerni oportere? quodque ad illam
respondetur, tutum omnino limpidumque esse posse, etiamsi aut ve
risimilibus tantum responsis expediatur posterior, aut quid huic sit
respondendum, ignoretur plane? Quoties in Physicis certissimi sunt
effectus, omniumque sensuum testimonii concordes, etiamsi non
modus solum, quo fiant, sed & causæ ipsæ altissimis sint involuta te
nebris? Atque ut non extra propria septa me debeam conferre, nun
quid distinguimus omnes quæstionem, an Petrus Romam venerit, an
Ecclesiam illic fundarit, an ejus Ecclesiæ Episcopatum gesserit, an mor
tuus denum ibi, sepultusque fuerit, a quæstionibus iis, quæ circa ad
juncta formantur: velut qua occasione, quo modo, quo tempore Romam
venerit, quamdiu gesserit Episcopatum, quo suo, quo **CHRISTI**, quo
Neronis anno mortem oppetierit? Et nunquid dirimi priores, nun
quid omni cum certitudine, quam quis in hoc genere requirat, finiri
possunt; etiamsi non perspicua æque, facilisque sit ad posteriores re
sponsio, imo controversiis haud levibus etiam inter nostræ fidei ho
mines subiecta? Quod si ita est, quis non videt pariter, suam ple
namque huic rei certitudinem constare posse, CLEMENTEM ac quis
quis ante hunc, vel in posterum fuerit, qui a PETRI morte Roma
num gesit Episcopatum, Primatum cum illo simul gesisse; etiamsi,
quo id factum sit modo, ut Primatus Episcopati necleretur, quique
Episcopi, iidem Primate fierent, aut nonnisi verosimiliter statui, aut
prorsus definiri non possit? Satis, modum hujusce rei aliquem fuisse
possibilem: satis, non defuisse sufficientem ac requisitum: quoniam
quidquid est, certissimisque argumentis probatur esse, id & modum
habere suum requisitum, ac sufficientem, ut sit, dubitari non debet.
Quare deinceps hoc Tibi contigit, VIR CLARISSIME! ut qui caven
dum a fovea monuisti, in foveam ipse incideres. Supposuisti, in
quam, Tute, quod supponendum non fuit. Supposuisti unum quem
piam pluribus ex modis sigendum prius, evincendumque esse, atque
in hac veluti basi erigendam assertionem illam: *Clemens I. fuit totius*

H 3

Eccl-

Ecclesiae Primas; maxime si quis eam demonstratam cupiat. Ego vero & ostendi necessitatem ejus rei nullam esse, & hoc potius cavendum moneo, ne quis ex modo id statuendum putet, quod evenerit; sed eo applicet eventum, ut modum, qui cum illo magis cohaerere videatur, determinet. Hoc THEOLOGI SYSTEMATICI, hoc CANONISTÆ, hoc BONI LOGICI erit.

§. XVIII. Interrogationum satur, ac qui sauis jam proposuisset ænigmatum nulli OEdipo solvendorum; ita concludit VIR CLARISSIMUS: "Dic ergo, quod, disponente per suam providentiam Domini, effectum sit, ut Petrus, relictâ Antiochiâ, Romæ eligeret sedem, indéque, ut Apostolatu suo fungeretur alibi, discedens, denuò tandem reverteretur ad Urbem, *Romani Imperii caput, ac sedem*, cuius urbis ecclesia, à Capite totius ecclesiæ fundata, ejusque martyrio honorata, facta sit *Mater omnium ecclesiarum*. aliarum quidem per spiritualem generationem, tanquam filiarum à Romanâ egressarum, aliarum vero per accessionem, & adoptionem, quatenus etiam illæ, quæ à Romanâ non erant egressæ, ecclesiæ eandem pro almâ suâ matre venerabantur. Successivè hoc factum est, in Imperio tamen Romano proniùs ac citiùs, eoque Roma mundi caput esset: ita, ut S. Ireneus lib. 3. cap. 3. rem jam sœc. II. consecutam, fixam, atque vigen tem descripsicerit: *ad banc enim ecclesiam PROPTER POTENTIORREM PRINCIPALITATEM* (i. e. majoritatem omnium ecclesiæ ruin summam) NECESSE est OMNEM convenerire ECCLESIAM, hoc est, eos, QUI SUNT UNDIQUE, fideles. NECESSE, inquam, est, tum ex institutione Christi, quâ voluit, fore aliquod Caput suæ visibilis ecclesiæ visibile, tum ex determinatione Ecclesiarum, quæ vel ex Romanâ prodierunt, genitæ per eam, vel ad eam se contulerunt, aliunde jam genitæ; id quod necesse viderant esse ad obediendum Christi institutioni in thesi cùm in hypothesi istius manifestæ Dei sic disponentis providentia non potuerit alia ecclesia ad hoc commodius, digniusque determinari, quam existens in Urbe orbi imperante." (f)

Multa hæc sunt, quæ retuli ex VIRO CLARISSIMO; quoniam tamen

(f) §. IX. sub asterisco pag. 43. & 44.

tamen implicata nimis invicem, connexaque sunt, una serie referenda omnia fuerunt. Sed an triumphum captavit ea in conclusione? Obstant, quæ dixi; & eliso, vel in vanum assumpto antecedente frustra superstructur consequens. Si etiam se solo illud, neque ut deductum, spectabatur, quomodo id dicam, quod vult dici CLARISSIMUS? Itane vero! Hoc dicam ego, Primum per reliquum primum a PETRI morte vacasse sæculum, donec tandem sæculo II. ac prope sub IRENÆI tempora ille Romanus emerget Pontifex, qui coniunctum illum cum Episcopatu teneret? Quid ergo fiet Primatu CLEMENTIS? Non solum pro incerto habencus, sed penitus negandus erit; negandus autem vel maxime, si de illo loquamur tempore, quod a PETRI morte proximum decurrit. Quantæcumque enim crisi exposita, incertaque sit Chronologia; qui PETRI vitam ultra primum producat æræ Christianæ sæculum, nemo unius existit. An autem hoc volelas, CLARISSIME! aut nunquam, aut diuturno saltu post PETRI obitum tempore Primatum non esse getum a CLEMENTE? Plus ergo significasti, quam dixisti. Dicendo meticulosum duntaxat te prodidisti, ne id certum asseverares, quod forte verum non sit; significando, & rei certitudinem, & rem ipsam negasti. Quodsi autem incertus, imo nec verus sit quidem Primatus CLEMENTIS; si non ideo verus, quoniam secundum est expectandum sæculum, ac jam satis adultum, donec Romanorum sit Pontificum aliquis, quæcum capessit sedē stabili donatum: vide, quid consequens ita ex re sit. Alius EVA- RISTI, alias ALEXANDRI; alias prioribus istis ac te multo siden- tior SIXTI quoque, si non omnium prope ad IRENÆI ætatem Romæ Episcoporum se litem Primiui movit re posse arbitrabitur. Quid ita? successive hoc factum est, ut Romana Ecclesia facta sit mater altiarum Ecclesiæ triplici illo per te adducto modo; neque quo id tempore factum sit, aut tu satis ipse determinas, aut alius sibi deter- minandum ducet in tanta Chronologiae incertitudine; nisi quod forte sensurus sit tecum, rem jam consecutam, fixam, utque vigenter, dum IRENÆUS ea, quæ profers, scripsit. Atqui & ipse hic IRENÆUS, & ipso, quem profers loco, non jam sextum modo, septimum, & octavum; sed duodecimura plane post Apostolos PETRUM, & PAULUM, suæ ætatis Romanorum Pontificem commemorat ELEU-

THE-

THERIUM. En ergo uni mota lis, quantas post se trahet alias ! en quo abducat illa litigandi licentia !

§. XIX. Videamus nunc, quam recte sis usus textu IRENÆI, quamque apta illum interpretatione donaris. Ubi hoc primum mihi gratulor, quod POTENTIOREM PRINCIPALITATEM majoritatem Ecclesiarum omnium summam, neque cum Jansenista Anonymo (g) politicum Urbis orbi dominantis principatum, interpretandam duxeris. Manifestum enim hac ratione arbitror, principalitatem abs te illam intelligi, quam Romana habeat Ecclesia, coquod sit *mater omnium Ecclesiarum*, ejusque Episcopus communis omnium fidelium Pater, etiamsi modum, quo enata ea sit *principalitas*, nonnisi succedaneum ponas; etiamsi hunc petas ultimo ex *determinatione Ecclesiarum*, quæ a Romana non erant egressæ, causamque, cur eæ sic potius, quam alter se se determinaverint, fuisse velis, quod Roma mundi caput esset, atque in *hypothesi manifestæ Dei* sic *disponentis providentiæ* non potuerit alia Ecclesia commodius ad hoc, dignusque determinari, quam existens in Urbe orbi imperante. Gratulor deinde, quod verba illa : *Ad hanc enim Ecclesiam juncta cum convenienti vocabulo, contra quam Anonymus ille sentiat, (b) de consensu in fide ac traditione, de communione cum Romana Ecclesia, illiusque Episcopo tanquam unitatis centro ab omnibus servanda fidelibus, jam satis recte accipi possint.* Gratulor denique, quod conspirationis hujus, ac communionis necessitatem ex majoritate omnium Ecclesiarum summa, facta per Temetipsum ad id potestate, concludere liceat. His quippe tribus sic constitutis, manifestum me facturum arbitror, primo contra rectas Hermeneutiæ regulas, soloque tuo ex arbitrio id asseruisse te, quod rem hanc, eoque, quo asseruisti, modo gestam JAM SÆCULO II. confectam, fixam, atque vigentem descripscerit IRENÆUS. Secundo huc potius omnia conspirare, ut credamus, assertam ab IRENÆO principalitatem eandem ipsam esse, quam in Romanam Ecclesiam intulit S. PETRUS, quæque semel illuc illata semper eidem adhæserit, adeo, ut post D. PETRI obitum in nullo ejus Successore vel vacasse unquam, vel tantum nutasse existimari possit.

Pri-

(g) Pag. 470.

(b) Pag. 462. & seq.

Primum ut pateat, nihil aliud est dicendum, quam neque in textu IRENÆI quidquam esse, quod triplicem tuum exposcat modum, quo nata, confectaque sit principalitas Ecclesiæ Romanæ, & cum tanta quidem, quantam tibi statuere libitum fuit, successione; neque antecedentia, aut consequentia totius capitii si inspiciantur, ullam apparaturam sententiam, aut etiam sententiæ alicujus laciniam, quæ hanc præ alia quavis interpretationem requirat. Aequitatem appello Lectoris cuiuslibet, qui cum textum abs te productum in verbis suis expanderit, Ipsum adire IRENÆUM, cumque his, quæ toto illo disseruntur capite, conferre diligenter, atque ad amissim explorare non deditur.

Alterum autem annon ipse satis ostendit IRENÆI scopus, modulusque, quo ad illum connisit fuit? Scopus erat, ut traditione, eaque genuina prorsus, uniformi, atque constante hæreticos sui ævi confundere; traditionem autem non alia certius via, quam successione Episcoporum ab Ipsi inde Apostolis repetenda, ad nos pervenisse ostenderet. Cum vero longum haberet in hoc tali volumine suo omnium Ecclesiæ numerare successiones: compendio se rem agere posse credidit, si modo Maxima, & Antiquissima, & omnibus cognitæ, a gloriofissimis duobus Apostolis PETRO & PAULO Romæ fundatæ & constitutæ Ecclesiæ eam, quam habet ab Apostolis traditionem, & annuntiatam omnibus fidem per successiones Episcoporum pervenientem usque ad nos indicaret; satis id fore, ut attingeret scopum, confunderetque omnes eos, qui quoquo modo vel per sui placentiam malam, vel vanam gloriam, vel per cæcitatem & malam sententiam, preterquam oportet, colligunt. Rationem accipe. Ad hanc enim Ecclesiam propter potentiorem principalitatem necesse est omnem convenire Ecclesiam, hoc est, eos, qui sunt undique, fideles; in qua semper ab his, qui sunt undique, conservata est ea, quæ est ab Apostolis, traditio. Itaque & solos jam Ille enumerat Episcopos Romæ, quos eo numero, ac ratione, qua invicem successisse credidit, ad ætatem usque suam perduxit. Atque istud dum fecit (Nam præterea integrum nullam, nominibusque distinctam suis successionem protulit) ad hunc modum conclusit: Hac ordinatione, & successione ea, quæ est ab Apostolis in Ecclesia traditio, & veritatis præconatio pervenit usque ad nos: & est plenissima bæc ostensio, unam &

eandem vivificatricem fidem esse, quæ in Ecclesia ab Apostolis usque nunc fit conservata, & tradita in veritate. Conferantur nunc quæsio, omnia ita, & quo valere possint, quorsum conspirent denique, attendatur. IRENÆUS cum traditione pugnare veleret, ea, quæ est Ecclesiae Romanæ, pugnandum censuit præ cæteris. Quid causæ est? Videbatur hæc Ipsius una esse instar reliquarum omnium; in hac una velut in carmine suo rebatur verti, quidquid reliquæ per orbem crederent Ecclesiæ; unam proinde hanc dum protulisset, dum firmasset ex *successione* Episcoporum suorum, plenissimam simul ostensionem se fecisse, unam atque eandem vivificatricem omnium fidem se demonstrasse putabat. Cur autem istud? quia necesse est, ad hanc Ecclesiam omnem convenire Ecclesiam; convenire, inquam, in fide, doctrina, communione cum illius membris, ac Capite. Et quæ hujus ratio necessitatis? Potentior *principalitas*, quæ Ecclesiam Romæ super reliquas effert Ecclesiæ; quæ Romanæ traditioni, ac fidei illum conciliat *externum* splendorem, ac *quoad nos* pondus adjicit, ut dum ex traditione, fideque illa certatur, communi Ecclesiæ omnium traditione certatum videri possit. Et post hæc quis non intelligat, aut non multo id saltem habeat verosimilium, uti traditio, fidesque perpetuo est conservata Romæ, & non a Romanis solum, verum & ab his, qui sunt uniuscæstus fidelibus, ob perpetuam illam cum Romana traditione, ac fide confessionem; sic & necessitatem hujus confessionis perpetuam fuisse quandam; atque haud secus causam necessitatis perpetuam, potentiorē scilicet *principalitatē*, quæ semel a D. PETRO in Romanam illata Ecclesiam, in quemlibet inde Successorem ab ejus morte transmissi fuerit; imo sic quoque sensisse IRENÆUM, atque hoc ipsum jam occupasse, dum MAXIMAM eam, dum OMNIBUS cognitam appellabat Ecclesiam? *maximum* scilicet non secundo solum, sed etiam primo saeculo; omnibus non suam circa ætatem modo, sed etiam præteritis retro temporibus cognitam: quia semper & magnitudinem retinuit illam, qua obscurum PETRI principatum inclinaruit; & ex ea se spectabilem cuique, ac præ reliquis omnibus cognoscendam obtulit.

Prætereo argumentum ex ipsis, ut loqui mos est, *rei visceribus* desumptum, quo evincerem, *principalitatem*, qualem tu statuis, tuisque illis enatam modis, neque cum hæc scriberet IRENÆUS, neque longo

longo satis post tempore *confectam*, nedum *fixam*, atque *vigentem* extare potuisse: eo quod satis habeam, textum cum contextu collatum nihil afferre in rem tuam præsidii; quod autem obsit, plurimum.

§. XX. Sed tamen "conforme hoc est (quod dici voluit CLARISSIMUS, atque ex IRENÆO stabiliendum putavit) "Conc. Chalcedon. Defin. 28. *Antique Romæ throno, QUOD URBS ILLA IMPERARET, jure PATRÈS privilegia TRIBUERUNT. Et edem consideratione moti 150. Dei amantissimi Episcopi sanctissimo NOVÆ ROMÆ throno æqualia privilegia tribuerunt, rectè judicantes, URBEM, QUÆ ET IMPERIO, ET SENATU HONORATA SIT, ET ÄQUALIBUS CUM ANTIQUISSIMA REGINA ROMA PRIVILEGIIS FRUATUR, etiam in rebus ecclesiasticis, non secùs ac illam, extolli ac magni fieri, SECUNDAM post illam existentem.* Harduin. Conc. Tom. II. col. 614. Adde col. 626. Act. 16." (i)

Quid, si conforme esset, ideone vicisses? ideone obstrictos teneres nos, ut ad eum canonem NB. 28. (aut, ut tu vocas, *definitionem*, non quidem male; fors tamen ea ductus ratione, quam infra patefaciam) mentem, loquendique rationem nostram componeremus? Nunc quid hic ipse canon est, cui intercesserunt Legati Apostolici? cui tanta cum fortitudine restitit S. Leo? cuius dispositionem veluti N. CÆNO canoni adversam per tot annorum decades Romana improbavit Ecclesia? Præformata enim jam fuerat can. 2. vel si alia fiat divisio, 3^{to} Synodi CONSTANTINOPOLITANÆ I. neque interea Papalem ullum obtinuerat assensum. Nosti, me verum scribere; imo nosti, quot postea non decadibus solum annorum, sed saeculis integris tum adversus CONSTANTINOPOLITANUM canonem, tum adversus CHALCEDONENSEM 28. reclamatum fuerit a Romanis. Quare non opus est, ista nunc persequi pluribus. Intercessionem tamen a Legatis factam in Concilio CHALCEDONENSI, quoniam non protulisti tu (& in promptu causa est, cur non protuleris) prætereundam tanto minus existimavi, quanto magis tuum sequendum fuit consilium, ut HARDUINI columnæ diligenter invicem confer-

I 2

rentur.

(i) §. IX. sub asterisco pag. 44.

rentur. En igitur illam, posteaquam cum duabus a te citatis etiam tertiam contuli 643. aet. 16. *Lucentius Reverendissimus Episcopus, Vicarius Sedis Apostolicae dixit*: *Sedes Apostolica nobis praesentibus humiliari non debet* (in græco : *nobis praesentibus omnia fieri præcepit*) & *ideo quæcumque in præjudicium Canonum, vel regularum vestrum gesta sunt nobis absentibus, sublimitatem vestram petimus, ut circumduci iubatis* : *si alias ; contradic̄tio nostra bis gestis imbareat, ut noverimus, quid Apostolico Viro, Universalis Ecclesie Papæ* (in græco : & *totius Ecclesie præcipuo Episcopo*) *referre debeamus* : *ut Ipse aut DE SUÆ SEDIS INJURIA, aut de CANONUM EVERSIONE possit ferre sententiam.*

Sentio, quid obmovere possis : Canonem diu a se improbatum aliquando tamen Romana est amplexata Ecclesia. In quo igitur ? An quod toleraverit tandem alterum illum Episcopi novæ Romæ locum, tanta cum arrogantia quæsitus ? an quod indulserit etiam ? Fateor, Sed an idcirco & illud ratum habuit : *Antique Romæ Throno, eo quod urbs illa imperaret, iure Patres privilegia tribuerunt?* An incidens quoque illud : *recte judicantes* ? vel *judicandi propositam ibidem rationem ex æqualitate politica derivatam* ? Quibus id me ex monumentis docebis ?

Dabo tamen, & utramque hoc ratum habuisse denique, ut nullus in me sit prætermissæ liberalitatis defectus. Age, de quibus igitur privilegiis est illic sermo ? Loquatur ipse Canon in his, quæ illico subjecit : *Et ut Ponticæ, & Asianæ, & Thraciæ DIOCESEOS* (satis intelligis hoc vocabulum antiquorum ex usu acceptum) *Metropolitaní soli, præterea Episcopi predicatorum Diœc̄sum, quæ (k) sunt inter barbaros, a predicto Throno Sanctissime CONSTANTINOPOLITANÆ Ecclesie ordinentur... convenientibus de more factis electionibus, & ad Ipsum relatis.* Nonnisi PATRIARCHICA ista sunt privilegia, humanique juris, quæ præter secundum honoris, ac sellionis locum, *juris* pariter duntaxat *humani, CONSTANTINOPOLEOS, seu NOVÆ ROMÆ* adjiciuntur Episcopo. Quidni ergo nonnisi PATRIARCHICA sint, eademque *humani juris*, quæ ad Primatum Pontificium

(k) fortassis: qui. Confer Hard. col. 627. uti & col. 613. & col. 628. textum græcum.

citum per temetipsum non humano duntaxat, sed divino CHRISTI jure constitutum haud quamquam extendi debeant, quae PATRES quondam sive in Conciliis congregati, sive extra illa in Romanam Sedem contulerunt? Convenit enim inter nos, non modo PRIMATEM UNIVERSÆ ECCLESIAE, sed & PATRIARCHAM OCCIDENTIS Romanum esse Episcopum, neque ad præsentem pertinet controversiam, ut, quanta sint Primatus divinitus instituti jura, quantumque iis per Ecclesiam adjici possit, definitur. Si quid potuerit adjici, illud profecto est, quod jure *divina* haud satis determinatum fuit, ut *humano* fuerit determinandum amplius. Imo, annon Canon ipse ea habet pro PATRIARCHICIS? quoniam iisdem *ÆQUALIA* a certum quinquaginta Episcopis in NOVÆ ROMÆ THRONUM congeta docet; & quod æquaret Primum D. PETRI, neque in solidum adjudicare utrius Throno, neque partiri inter utriusque Throni Episcopos in mentem venit eorum, qui præeunte sibi CONSTANTINOPOLITANA Synodo, canonem illum instaurandum duxerunt. Ecquid igitur movere te potuit, ut Patres CHALCEDONENSES de privilegiis per se ac divinitus Primi, quamvis non juxta te Sedi, affixis locutus, ac velut a Patribus priorum temporum Romanam potius, quam aliam in Sedem congeta fuissent, decrevisse arbitrareris? Rationis nihil invenio, nisi quod patrocinium a non cogitantibus, imo & invitis extorquere volueris.

§. XXI. Lustrandum modo, an, cum nihil conferme dictis tuis CHALCEDONENSI conseceris ex Concilio, salvare saltem potueris FLORENTINUM. Verba tua in Additione Ima sic sonant: "Salva" nihilominus est definitio S. Concilii generalis Florentini de an. 1439. "item diffinimus, sanctam Apostolicam sedem, & Romanum Pontificem "in universum orbem tenere Primum, & ipsum Pontificem Romanum "successorem esse beati Petri Principis Apostolorum, & verum Christi Vi- "carium, totiusque ecclesiæ Caput, & omnium Christianorum Patrem ac "Doctorem existere, & ipsi in beato Petro pascendi, regendi, ac gubernandi universalem Ecclesiam à Domino nostro Jesu Christo plenam potestatem traditam esse; QUEMADMODUM ETIAM (καὶ ὅν τεπτον καὶ, quod aliqui vertunt, quemadmodum) in gestis Oecumenicorum Conciliorum, & in sacris Canonibus continetur. Hæc, inquam, definitio

" finitio salvatur; simul enim atque plurimæ ecclesiæ id, quod *Christus* " in genere, & nullâ particulari ecclesiâ nominatâ, instituit, ad Roma- " niam Ecclesiam, ejusque Pontificem determinârunt, subintravit tota " ac plena S Petri potestas, eadémque non humani duntaxat, sed etiam " divini juris." (1)

Quam hæc belle, quam paucis, velut si in oculum res insiliret, dicuntur! Quam autem & belle, & haud secus paucis dispungi possunt, si dixero, neque IRENÆUM, neque Concilium CHALCEDONEN- SE illam agnovisse Ecclesiarum determinationem, qua factum fuerit, ut subintrare debuerit tota, plenaque S. Petri potestas, quippe quæ se- mei in Romanam Ecclesiam ingressa, jamtum stabilem illuc sedem ac- céperit, & in nullo illius Pontifice vacarit! At non oportet in tam paucis consilere me, ne nimis perfunditorie rem, quæ diligenter lu- strari debuit, transcurrisse, aut minus de illa, quam oportet, Lecto- rem communuisse videar.

Adparet ergo iam iterum, VIR CLARISSIME! negari abs te, nec modo incertum reputari Primum Pontificium S. CLEMENTIS; adparet, incertos haud secus tibi esse, si non etiam negandos putas, Primatus plurimæ aliorum Romæ Pontificum. Nam simul atque PLU- RIMÆ Ecclesiæ id, quod *CHRISTUS* in genere, & nulla particu- lari Ecclesia nominata instituit, ad Romanam Ecclesiam, ejusque Pon- tificem determinarunt: TUNC enimvero (& non PRIUS) SUBIN- TRAVIT (quoniam jam intraverat quidem, sed tantum per modum hospitis, non adhuc stabilem habitura sedem) tota, plenaque S. Petri potestas; imo non hanc stabilem est adepta sedem sive in CLEMEN- TE, sive in iis, qui consecuti sunt, Romæ Pontificibus, donec deter- minatio illa absolveretur Ecclesiarum. Et quandonam hæc absoluta fuit? sub quo Pontifice? Incerta omnia sunt, nisi quod necessario ad hoc existente PLURIMARUM concursu res ista ex primo ad secun- dum saeculum devolvi debeat: quot interea Pontifices sine Primatu unquam gesto mortui fuerint, perinde habet. En inprimis aliquid, quod intactum præterire non debui.

Quodsi jam rationem ipsam, prout ratio est, atque ad salvandam FLORENTINI definitionem accommodatur, intueri velim; quam occur-

(1) §. IX. Addit. I. pag. 44.

occurrunt multa, quæ mentionem de se fieri postulent! Cum autem non facere possim omnium, faciam aliquorum. Persuasum, ut reor, voluisti; si fallor, persuasum id saltem videri potuit (siquis ipsos non adeat fontes; & quotusquisque est, hoc qui faciat?) Concilii CHALCEDONENSIS hanc ipsam esse definitionem, quam profers: *Antique Romæ Throno &c.* Forsitan etiam *definitionis* potius, quam *canonis* vocabulo utendum censuisti, non quia ad id invitabat titulus: ὁριστικοὶ, id est: *Definitiones Ecclesiasticae &c.* (Nam perinde, ut canonem diceres, quod mox subjicitur: *Tituli Canonum*, quodque deinceps occurrit: *Canon primus &c.* invitare poterat) sed quia significare volebas, æque venerandum, vel paris authoritatis Canonem esse CHALCEDONENSEM, atque sit definitio FLORENTINI; cumque prior juxta te afferat determinationem Ecclesiarum, sub *Patrum*, id est Episcoporum nomine; nihil jam adversum occurrere posse in posteriore, quæ proinde eo, quo tu faciebas, modo cum priore concilianda fuerit. At monendus hic mihi Lector est, totum, quod protrulisti, nonnisi *rationem definitionis*, vel *Canonis* esse, quam distinguendam solcite ab ipsa *definitionis substantia*, neque semper pari autoritate censem, nisi nossem aiunde, docerer ab Auctore Anonymo Principiorum Juris Ecclesiastici cap. VI. §. 44. En rei definitæ substantiam: "Sanctorum Patrum decreta ubique sequentes, & Canonem, qui nuper lectus est, centum & quinquaginta Dei amantissim rum Episcoporum agnoscentes, eadem quoque & nos decernimus, ac statuimus de privilegiis Sanctissime Ecclesie Constantinopolis novæ Romæ." En quoque RATIONEM decernendi: ETENIM *Antique Romæ Throno &c.* quæ tu præcedentibus omissis, atque etiam particula *causaliter*: ETEMIN, sola recitanda putasti. Monendus præterea, longe disparem esse, inde CHALCEDONENSIS *Canonis*, hinc FLORENTINÆ definitionis autoritatem. Definitio est ex earum numero, quæ sibi habentur; aut an tibi forsitan non videtur talis, eo quod FLORENTINI Patres uno solum in loco, ubi de SPIRITU S. agunt, sic loquantur diserte: *Definimus, ut HÆC FIDEI VERITAS ab omnibus Christianis credatur, & suscipiantur, sive omnes profiteantur, quod SPIRITUS S. &c.* in reliquis autem, quas subiungunt, definitionibus expressam *fidei* mentionem non faciant? At vide, ne hoc pacto.

&



& teria definitio, quæ est de valore Consecrationis in *azymo*, aut *feruentato* pane; itemque quarta, quæ est de statu animarum post hanc vitam, inter FIDEI definitiones computari non debeant. Liberalissimus tamen ut sim, si non fidei hæc sit definitio, id definiri certe, quod *fidei proximum*, aut quod ab *omnibus* tenendum sit Christianis, iuficias ire non voles. Res vero est mere discipline, quam CHALCEDONENSIS statuit Canon, illudque plane non statuit definiendo, *antiquæ Romæ Throno* sua per *Patres* privilegia tributa esse. Accedit, quod Canon a solis confessus Orientalibus reclamantem, & per multa facula habuerit Romanam Sedem; Definitio autem de communi Orientalis videlicet, & Occidentalis Ecclesiæ confessione, præsidente, illamque ratam habente EUGENIO IV. totius Ecclesiæ Primate confessa fuerit. Quam ergo dispar utriusque authoritas! quam eo certe sufficiens, ut Canon, vel *incidentia* Canonis ad normam potius definitionis, si alioquin torta sit nimis hujus, ac violenta expositio; quam definitio ad mensuram Canonis sit exigenda!

Atque hic ad reliqua deducor, de quibus Lectorem censui monendum; simulque Criter agam illius modi, quo per te salva consistit FLORENTINÆ Synodi definitio. Hæc indefinite, ut loquimur, circaque ullam exceptionem vel temporis, vel personarum pronuntiat, *Apostolicam Sedem*, & *Romanum Pontificem in universum orbem tenere Primum*; pronuntiat eodem modo, *Romanum Pontificem Successorem esse B. Petri Principis Apostolorum* (scilicet in Primatu ipso) tum cætera, quæ sequuntur. Regula est autem: id genus enuntiationes & in materia dogmatica universè accipi. Si quandoque sit locus exceptioni, ea non facienda temere; sed gravibus, solidisque in medium alatis argumentis firmando erit. Qualia isthic tu protulisti, ut CLEMENTEM, aut etiam complures alios, de quibus dubitari non potest, ROMANOS, & quidem PETRO jam mortuo, Pontifices fuisse, fas sit excipere? Cassas, ut vidimus, interrogaciones; adoptionem, & accessionem, si satis mature cæptam, at sero nimis completam; textum IRENÆI, si non adversum, at nulla ratione propitium; CHALCEDONENSE Concilium nec in Canone favens, nec in ratione Canonis, imo manifeste de privilegiis duntaxat PATRIARCHICIS, humanique juris locutum. Hæc gravia quisquam, hæc solida existimabit, præfertim

Sertim cum ponderis *externi* nihil, nisi a tua solius authoritate, iisdem inesse viderit? Frustra igitur & parenthesin immisces illam *καθ' οὐ τροπον καὶ* &c. tanquam si præsidii aliquid ex ipso textu nanciscereris. Scio, *Natales Alexandros*, aliosque Gallicanarum partium Theologos, scio, plures nunc etiam e Germanis limites inde colligere ejus potestatis, quæ Primate divinitus instituto sit propria, ac plenitudinem præcipue illius ad gesta Conciliorum, Patrumque dicta moderandam docere, quoniam nonnisi salvo hoc moderamine, quod & infallibilitatem detrahatur Pontifici, & Conciliis eum inferiorem faciat, stabilita fuerit a FLORENTINO. At qui limites colligat temporis, quod a PETRI obitu decurrit; qui personarum, quas interea legitimos, indubitosque haberet Romæ Pontifices; alium præter te novi neminem, nescioque, an nosse possim: cum nec FEBRONIUM isto videam in numero, imo adversantem aperte tibi sub finem disquisitionis hujus sim producturus. Salva igitur est definitio Florentina, atque apprime conciliatur cum eo, quod IRENÆUS dixit; quod statuit, imo quod immiscerit tantum CHALCEDONENSE: sed salva fieri per rationem abs te productam, non debuit, non potuit.

§. XXII. Pergis Addit. 2. "Sic ego rem explico." (m) Recte, quod TE, & quidem *solum* hujus rei expositorem adducas. Nam nec alius, quam tu, SE facile PRÆSIDEM ejus exercitii, in quo novitas ista propugnatur, & haberi velit, & inscribere. Audiamus tamen, cur ita explices. "Quia non video, quod aut *ipsa sibi Romana Ecclesia* " Primum dare potuisset," (Concedo, si sermo sit de donatione *primæva*, quia vel CHRISTUS hanc fecit, vel PETRUS; concedam usque adeo, si donationem tantum *secundam*, vel electionem novi Primitatis intelligas, dummodo præscindi patiaris ab iis, quæ a prævia seu CHRISTI, seu PETRI voluntate statuta fuerint) "nec quod ei S. " Petrus;" (Dicam hic tantum, non repugnare modum, quo id potuerit PETRUS. Addam, verosimilem quoque esse, atque a multis, magnique nominis Viris propugnatum, propugnari etiam adhuc; ubi, quem ducem tibi, patronumve habeas, nescio, an constet ulli; neminemque nos a te quidem ipso prolatum, contuiti sumus) "neque etiam, K quod,

(m) §. IX. Addit. 2. pag. 44.

" quod, ultra dispositionem aeternae Dei providentiae, per quam Capitis
 " Ecclesiæ Sedes perpetuò Urbi Romæ affixa est, video positivum DO-
 " MINI præceptum," (Quam facile ab aeterno sic providere, tam fa-
 cile revelare in tempore, ac munire præceptra revelationem fuit, &
 utrumque sic contigisse satis verosimiliter ducibus, patronisque multis
 afferitur, quamvis ad evidentiam non videatur) "quo jussisset ipse,
 " illi Ecclesiæ fore dignitatem Capitis sibi Vicarii perpetuam annexam, in
 " quā S. Petrus fundaturus Episcopatum; ipsem futurus esset particu-
 laris simul ejusdem ecclesiæ, hanc prærogativam honorandæ, Episcopus,
 " idem mansurius usque ad mortem." Aggrederer hic te, nisi & sequen-
 tia ob connexionem, falsasque his, & præcedentibus immixtas suppo-
 sitiones, quas eadem opera patefacere volui, subiectanda fuissent.
 " Sanè certæ fidei est Catholicis omnibus, quod S. Petrus fuerit visibile
 " totius Ecclesiæ Caput, sive, ut eum Euseb. in Chronico fol. 35. vocat,
 " Christianorum Pontifex primus; certæ quoque historiæ est, quod is
 " fuerit insipit primus Romæ Episcopus, Romæ crucifixus: Nondum
 " verò certum est præceptum Domini, quod designasset, quis ex tot
 " particularium ecclesiarum episcopis deberet Petro succedere in Principatu
 " totius Ecclesiæ; nondum certa est, nec fieri hypothesis subsumenda,
 " quod Petrus Episcopatum Romanum tenuisset usque ad mortem suam.
 " Non est hoc dogma fidei Catholicæ: ergo nec illud, quod ab hoc
 " dependet: Hinc ista quidem propositio nobis est dogmatica: Chri-
 " stus dedit Petro, & Successoribus ejus primatum; quia non propter
 " Petrum, sed propter mansuram post eum Ecclesiam dedit; non autem
 " ista: Episcopi Romæ fuerunt successores Petri quia Primatis ideo, quia
 " Petrus, QUI PRIMAS ERAIT, simul Episcopus Romæ fuit." (n)

Audivimus ad satietatem. Concedimus vero, non esse certum
 præceptum Domini. Seu dogma fidei Catholicæ hoc sit, seu non sit,
 quod Petrus tenuisset Episcopatum Romanum usque ad mortem suam; ne-
 gamus non esse CERTAM hypothesin istam, atque omni jure negan-
 dum contendimus prima hujus Disquisitionis parte. Quare hominis
 est multum in se ipso, & quidem solo fidentis, dum contrariae asser-
 tionis SE palam authorem facit, atque in ea tuenda PRÆSIDEM
 agnoscit voluit.

Con-

(n) *ibid.* & pag. 45.

Concessimus, & negavimus: ostendamus quoque quid suppositum sit falsi, quantumque illud sit, ac supponi plane non debuerit. Supponitur 1mo eos, qui præceptum adstruunt, necessitate arctatos esse, ut ipso in præcepto involvant *hypothesin PETRI* eum ad mortem usque retinentis Episcopatum, in quo succedens, succederet quoque in Primatu. Fateor, congruenter admodum involvitur; sed necessitas nulla est involvendi. Potuit sic statuere CHRISTUS, ut PETRO mortuo, sive ad mortem hanc suam, sive ad tempus tantum Romanæ gessisset Episcopatum Ecclesiæ, ROMANUS, sive qui tum primum heret, sive qui esset, Episcopus, una Primatum capesseret: quæstioque, an statuerit aliquid, præcisissimis ipsis moveri, quin & verosimiliter affirmantem in partem expediri poterit, et si eorum nihil, a quibus præcissum fuit, definiendum sumatur. Supponitur 2do eos, qui a PETRI morte perpetuam volunt, atque ut certam tuentur conjunctionem Primatus cum Episcopatu in Romanis Pontificibus, certitudine debere nisi præcepti illius, quod conjunctionem fixam reddiderit. Falsissimum hoc est; atque inaniter id eos aucturos jam occupatum fuit §. XIV. Supponitur 3to, demonstrandi hoc Theorema: *eum, qui Petro mortuo Episcopatum Romanum gessit, Primatum una gessisse, non aliam viam esse, nisi & subsumeretur istud, simulque certum redderetur: PETRUM Episcopatum Romanum ad obitum usque suum tenuisse, ut proinde, quisquis Successor primus fuerit, non nisi ab ejus obitu esse potuerit.* Ego quamvis hoc certum habeam, certumque, ut puto, reddiderim prima istius Disquisitionis parte; non tamen ita *subsumi* debere, non, inquam, *subsumptum* tale ut necessarium *demonstrationis* medium agnoscō. Alter processi eodem §. XIV. procedamque nunc iterum modum servando, quem hic mihi ipse suggeris. *Certæ fidei est Catholicis omnibus, quod S. Petrus fuerit visibile totius Ecclesiæ Caput. Certæ fidei* (aut an fallor isthic?) *certa ad minimum res erit, quod manserit tale Caput, usque dum moreretur. Certæ quoque Historiæ est, definitum a FLORENTINO fuisse anno 1439. Pontificem Romanum Successorem esse Beati Petri Principis Apostolorum, & verum Christi Vicarium, totiusque Ecclesiæ Caput. Certa iterum res, Definitionem hanc esse Concilii OEcumenici, ab OMNIBUS Catholicis venerandam: Certa res, eam uniuersè capiendam de omnibus saltem iis, qui post*

K 2

Petri

Petri obitum veri essent, indubitataque Romani Pontifices, per §. XXI. adeo, ut si etiam tolerabile tuum esset Systema de duobus Romæ Pontificibus, sed D. PETRO præmortuis, ideoque facultatis aliquid, tibi autem necessitas foret eos excipiendi ex *universalitate illa*, quoniam Principatum vivo *Petro*, certoque, quoad vixit, sibi servante, adipisci non potuissent; id tamen excipi, id exceptum tolerari non posset, Romanorum quemquam Pontificum, & qui certissime S. PETRO superstes vixit, non ejus *in Principatu Successorem*, non *totius Ecclesie Caput* extitisse. Igitur & demum *certa res* erit, eum, qui primus a PETRI morte Romanorum Pontifex fuerit, & sic deinceps, qui secundus, qui tertius, Principatum illum, ac Capitis dignitatem cepisse. Igitur omni ratione *certum*, CLEMENTEM D. PETRO SUPERSTITEM non Romanum solum Episcopum extitisse; sed etiam *totius Ecclesie Primatem*. En! quam ne ipso quidem Systemate tuo abduci eo debueris, ut item moveres Primatui CLEMENTIS! En! quæ præciso hoc Systemate, aut etiam gratis transmesso, illorum, quæ colligebam, demonstratio produci valeat! Supponitur 4to, atque ex dictis eruere primum est, quam etiam *falso*; DOGMATICAM hanc iis videri debere propositionem, atque ut DOGMATICAM vel supponendam, vel colligendam (*Episcopi Romæ fuerunt Successores Petri qua Primatis ideo, quia Petrus, qui Primas erat, simul Episcopus Romæ fuit;*) qui demonstratum putent, omnes a PETRI morte Romæ Episcopos, interque eos CLEMENTEM I. fuisse *totius Ecclesie Caput*. Non egemus hac *suppositione*: a collectione quoque abstinere possumus ob propositionis ejus sensum ambiguum, qui & DOGMATICUS dari possit, & talis quoque, ut intra *probabilitatis* subsistat limites, merumque in *Scholæ problema* recidat.

§. XXIII. Progredior ad HADRIANUM II. quo ultimum auctore certas eadem Additione secunda. "Hoc mihi videtur sensisse *"Hadrianus II."*" Nescirem, quid illud HOC esset: an, quod præmiseras proxime; an, quod paulo ante; an proxima cum præcedentibus, atque in unum omnia collecta fascem, quæ in Additione, tuoque ex sensu ad eum usque locum disputata occurrunt; nisi sequentia evoluerent magis, quid HADRIANUS iste, ac tecum, si Superis placet, sensisse videretur. Audiamus igitur, & sine interruptione totum, quod pro-

profers. "Hoc mihi videtur sensisse *Hadrianus II.* in Allocutione III.
 " ad Synodum Romanam contra Photium an. 868. apud *Harduin.*
 " Tom. V. Conc. col. 866. Romani Episcopi Sedi primū Petri Apo-
 " stoli meritum vel Principatus, deinde secuta iussionem Domini Conci-
 " liorum venerandorum authoritas singularem in ecclasiis tradidit potesta-
 " tem. Nota hīc quatuor: 1.) Meritum S. Petri per confessionem
 " Matth. 16. 2.) Principatum ejus, *ibid.* & *Ioan. 21.* 3.) Iussionem
 " Domini, nempē generalem, quā voluit manere usque ad consumma-
 " tionem sæculi formam suæ Ecclesiæ, supremum, sicut ordinaverat
 " Petrum, habituræ Episcopum. 4.) Authoritatem Conciliorum, quæ,
 " Domini generalem iussionem secuta, nec non Romæ dignioritatem
 " attendentia, Primum istum, usu ecclesiarum jam determinatum,
 " canone scripto firmarunt." (o) Audivimus: tertiumque, & quartum,
 num Hadriani sententiam exprimat, excutiemus, ubi primum aliquid
 circa ipsum textum, quod quidem multis leve videri posset, ponderis
 tamen alicujus esse ostendam, observaverimus.

Scribis: Romani Episcopi Sedi &c. & characterem varias in duo-
 bus primis vocabulis. Factum optime, & sic plane, ut fieri debuit.
 Nam verba, quæ lego apud HARDUINUM, sunt: *Scientes, quia*
EJUS Sedi &c. Omitis deinde vocabulum, quo inter dissyllaba bre-
 vius nullum esse possit; nam gemino duntaxat charactere constat: vi-
 delicet hunc *dativum:* *EI*, qui inter verbum *authoritas*, & *singularem*
 interponi debuit, & interpositus re ipsa fuit ab HARDUINO. Si jam
 quæris, quid ad rem istud: dicam, partimque tuo dicam ex sensu.
 Distinguis, nec ego fugio distinctionem istam, inter *primæva* Prim-
 atus jura, quæ intima illi, *essentialia*, & invariabilia sunt, quoniam ori-
 go eorum ipsa est CHRISTI institutio; & inter *secundaria*, quæ serius
 postmodum, & humano sint constituta *jure*, salvaque Primatus *essentia*
 abesse possint: velut quod idem *is*, qui Primum gerit, *Patriarcha* sit
Occidentis; quod *Italæ Primas*; quod respectu quarundam Ecclesi-
 rum *Metropolita*, vel *Archiepiscopus*; & sic communia quoque cum
 cæteris *Patriarchis*, *Primatibus nationum*, *Metropolitis*, vel *Archie-
 episcopis* jura illa possideat, quæ a Conciliis, & sacris Canonibus iisdem
 tributa leguntur. Distinguis quoque, nonnihil saltem, aut sic distingui
 posse

K 3

(o) *Ibid. pag. 45.*

posse non negabis inter Sedem Petri, quæ unica est, quæ perpetua,
 quæ semper eadem (loquor cum *autonomasia*, ut ROMANAM solam
 intelligi videoas) & inter *insidentes* illi suo ex ordine, sed non cum ea-
 dem se *uper juris humani* potestate, Romanos Pontifices. Hæc cum
 præfatus fui, video, dativum EI de illo intelligi posse, de quo intelli-
 gitur *genitivus EJUS*. Video, HADRIANUM cohærenter admo-
 dum, præsertim ad illa, quæ tu sentis, exponi de gemina potestate
 singulare, altera, quæ sit *divini juris*, quam Sedi tradiderit *B. Petri*
meritum, & principatus, quæque in nullo ejus Antistite defuerit; alte-
 ra, quæ sit *juris tantum humani*, quam DEINDE, id est progressu
 temporis veneranda tradiderit Conciliorum authoritas, vel potius usu
 jam traditam Canone scripto firmarit, non tam *sedis*, quam *sedentium*
 postea in eadem Episcoporum propriam, quoniam sine hac sedes
 ad tempus substituit, ac subsistere deinceps potuisset, sedium nihilom-
 nus omnium nobilissima vel ob eam solam potestatem, quam tradidit
 ei, ac nunquam a se avulsam, *B. Petri meritum, & principatus*. Di-
 ceretur etiam, ac satis apte, Conciliorum authoritas in hoc secuta *jus-
 siorem Domini*, sive *generalem*, sive *specialem*, quod etiamcum per-
 inde habeo; quoniam æquissimum fuit, ut Sedes, quæ Primum ha-
 bet *jussione Domini constitutum*, atque ex eadem jussione *perpetuum*, in
 his, quæ per humanum accedere ius possent, aliis a se minoribus non
 solum æquaretur sedibus, verum & in nonnullis excelleret. Video
 quoque, si contextum inspicio, sermonem illic esse de Synodo tempo-
 ribus SYMMACHI Papæ, & adversus hunc a THEODORICO
 Rege coacta ex Episcopis LIGURIÆ, ÆMILIAE, VALERIAE, & ex
 diversis regionibus, & ex SICILIA Insula, quibus ad se venientibus
 Rex dixerit, plura ad se de Papæ Symmachii actibus horrenda fuisse perla-
 ta, & in Synodi, si vera esset inimicorum ejus objectio, judicatione con-
 stare: Venerabiles vero Antistites ipsum, qui dicebatur *impetus*, de-
 buisse Synodus convocare prohibuerint, scientes, quia ejus sedi primum
 Petri Apostoli *meritum &c.* ut supra: nec ante dictæ Sedis Antistites mi-
 norum subjacuisse judicio in propositione simili, facile forma aliqua testa-
 retur. Scio autem, quorsum tu conjicias potestatem Synodos convo-
 candi, quæ est in Romanis Pontificibus, quamque certo non habeas
 divinum illud privilegium, quo Romanæ Sedis Antistites minorum non
 possint

possint subjacere iudicio. Utrumque satis loquuntar tot editæ abs te, aut tuo sub præsidio defensæ Theses; ac postremum speciatim vindic illa Dissertatio tua ad diem 3. Septembris anni MDCCCLXVI. (p) Sed ab altero multo fortiori rerum suarum vindice, & cui usque ad hanc diem teneris, profligata (q) qua Joannem XII. sola in Provinciali Synodo Romæ congregata, ob solam morum deformitatem in jus tractum, exauktoratum ab eadem Synodo fuisse, & exauktorari legitime potuisse, vario argumentorum apparatu suadere voluisti. VIDEO igitur jam denique, non hoc TIBI VIDERI debuisse, de singulari, quæ in textu asseritur, potestate unam tuam, HADRIANIque esse sententiā, quem si explicares, explicationemque aptares & præcedentibus illic assertis, & simul pluribus, quas tuas negare non potes, sententiis, ita potius, ut suggerebam ego, exponere debuisses. Sed sic expositus non favebat causæ tuæ, quam evertebat potius, si *meritum*, & *Principatus Petri*, neque præterea *Venerandorum Conciliorum authoritas*, Primatum in Romanam invexisset Sedem. Appareret quippe, vel ex *facto Petri*, vel ex *speciali*, factum ipsum præcipiente, *Domini iussione*, ac Primatum perpetuo cum ea Sede nebstentis, præcipuum, ac maxime singularem, quia uni soli propriam, Sedis ejus potestatem descendere. Igitur cavendum plane a tali expositione. Non ultra sentiat HADRIANUS, quam sit necesse; & hoc omne, quod est necesse, sentiat. Iussionem sentiat, sed *generalem* tantum, quam sit fecuta authoritas: & ubi singularem hæc tradidit potestatem, nonnisi Primatum tradidisse, vel Canone scripto roborasse intelligatur.

Videamus modo, an sic re ipsa senserit HADRIANUS: nam tertium hæc sunt, quartumque ex notatis a te, quæ speciatim me discussurum spopondi. Videamus quoque, an, cum talia sentire dicas HADRIANUM, non temetipsum implices. Ac primo quidem *iussionis* indefinitum vocabulum non solum *generalem* hanc tuam, qua CHRISTUS voluit manere usque ad consummationem sæculi formam suæ Eccle-

(p) *Nomen ei est: HISTORICO-JURIDICÆ VINDICIÆ. Exercitium, in quo continetur, confixum Romæ fuit anno MDCC-LXVIII.*

(q) *In ANIMADVERSIONIBUS ad vindicias Historico-Juridicas mense Februario anno MDCCCLXVII.*

Ecclesiæ, supremum, sicut ordinaverat PETRUM, habituræ Episcopum; sed etiam *specialem*, imo *specialissimam*, qua cum Romana Sede Primatum nexusset, significare de se idoneum est. Sed enim non continetur hæc in Scripturis: An igitur omnis, quæcumque est Domini iussio, in Scripturas relata fuit? Nullane tradita? Sed enim non vides tu istam: An idcirco nec vidit HADRIANUS? An nec alii ante HADRIANUM Pontifices, ac Venerabiles Patres, quibus ille stipulandum putarit? Forte illud obstat, quod traditio hujusmodi non sit *fidei Catholice*, imo nec *certa* quidem? Nullane igitur *probabilia* aliquando dictis suis immiscent Pontifices? Si hoc faciunt Concilia, & interdum, quando definiunt; an minus potuit Pontifex, & cum tantum alloquitur Concilium? Ex textu, CLARISSIME! vel ex contextu petenda ratio fuerat, cur iussio hæc diceretur *generalis*. Quid vero in textu est, unde concludas *generalem*? An, quia sola hæc *certa* est, *specialis incerta*; Concilia autem non sequuntur *incertam*? Cuperem scire, quæ ergo sit vis ejus vocabuli: SECUTA? An, quod hoc plane fecerint, hoc executioni dederint, quod iussit Dominus? Atqui sic certum erit, ea plus, quam *generalem* secuta esse iussionem. Enimvero an *generalis* hoc injungit, ut Primatus necatur cum Romana Ecclesia? Si autem mitius ea sit explicanda vox, ut *sequi* tantundem sit, atque *respicere*, vel se *aliquo modo accommodare*; quomodo conficies, ad traditiones quoque probabiles non se interdum accommodare Concilia, ubi sunt certa, in eo, in quo se accommodant, se nihil *contra* Dominicam iussionem actura, si forte talem, aut de tali quapiam determinata re non existere contingeret? An autem *tradendi* illa, vel *singularis potestatis* vocabula aliquid offerunt hujusmodi, quod iussionem nonnisi *generalem* exposcat? Quasi enimvero potestas illa, quocunque in sensu *singularis* fuerit, non æque *tradi*, id est *Canone scripto firmari* potuisset, sive ad *generalem*, sive ad *specialem*, sive ad utramque Domini iussionem respiciendo. Textus cum non faveat, anne magis contextus? Evidem, quamvis non semel illum, & a capite ad calcem percurrerim, invenire nihil potui, quod faveret, nec, ut reor, alias quapiam inveniet. Unum miror: & in eo te implicas (nisi mitigaveris sententiam, quam tenuisti alias) quod *formam Ecclesiæ usque ad consummationem sæculi mansuram* nunc demum ingredi incipiat SU-
PRE-

PREMUM ECCLESIÆ CAPUT, & in dignitate Capitis SUCCESSIONE, non obstante ea temporis lacuna, quod Successorem inter, & Decessorem intercurrere possit. Non ita loquebaris electus Professor, ac Laureæ Doctoralis Candidatus; non jam Doctor sive in Dissert. DE IDEA VERÆ CHRISTI ECCLESIÆ, sive in vindiciis scriptis ad censuram Ubiam, (r) quas præ manibus habeo. Atque hæc ad tertium.

Quartum vero cum excutio, quid, obsecro, in causa est, cur HADRIANUM solo de Primatu locutum dicamus? Singularis potestas nihilne aliud, quam hunc denotare, & annon æque id totum exprimere posset, quidquid Sedi (ut jam nullam vim faciamus in pronominibus EJUS, & EI) adhærescit eximum, & illustre, sive congenitum huic sit, cœlitusque dispositum; sive accesserit deinceps, usu, & per humanos Canones firmato, sancitum? Annon illud PRIMUM, ac DEINDE hunc maxime obvium exhibent sensum? Annon partem, ut ita loquar, singularis potestatis alteram a B. PETRI merito, vel Principatu, alteram a Conciliis, receptos jam usus roborantibus, derivari permittunt? Et cur immisces istud de Conciliis quoque ad DIGNORITATEM ROMÆ attendantibus, deque Primatu jam USU ECCLESIARUM DETERMINATO? Estne verbum in textu, vel contextu, quod hanc HADRIANI ostendat mentem, vel eam mentis interpretationem suggerat? Sic ergo visus quidem est HADRIANUS sentire tecum, sed visus ex ea cerebri fœcunditate, quæ tot peperit simulacra novarum rerum; aut si ex judicio quoque facultatis intelligentis, non hæc velut nativa vi, ac rationum inclinata pondere, sed

solo

(r) *Dissertatio vulgata fuit anno 1748. die 20. Septembris. Censura, ut arbitror, eodem anno lata: eodem aut mox in sequente adornatae vindiciæ, fortasse bauit multis cognitæ, quoniam, quod sciam, hactenus eas non expressit typus. In Dissertatione §. XVII. pag. 7. data opera judicaverat omittenda esse verba Canisianæ, ac vulgo notæ definitionis Ecclesiæ, hoc simul complectentis: sub uno in terris Capite, ac Rectore. In vindiciis præter alia totus quoque est in afferendo, tuendoque hoc factio.*

L

solo voluntatis jussu, ut HADRIANI consensionem decerneret, abducta fuit.

Fingamus demum *speciem* consensionis aliquam in Allocutione tertia: dubium mihi omne dispelleret Allocutio prima, in qua ita perstringit PHOTIUM Pontifex idem HADRIANUS: "Post hæc vero posuit IN COELUM os suum, & lingua ejus transit SUPER TERRAM, dum videlicet CONTRA DIVINAM ORDINATIONEM COELITUS IN BEATI PETRI PRINCIPIS APOSTOLORUM PRIMATU DISPOSITAM putridi gurgitis guttur aperuit, & ADVERSUS EJUSDEM REGNI COELESTIS CLAVIGERI APOSTOLICAM SEDEM, ET PRAECIPUAM, AC SUMMAM DIGNITATEM, ET POTESTATEM linguam suam more serpentis excutit. Harduin. Tom. V. Conc. col. 863. quæ tertia est ante eam, quam tu consuli voluisti. Manifestus hic sermo est de PRIMATU; nihil de Conciliis, vel usu Ecclesiarum, quæ illum Romanæ Sedi adicerint. Mentio unica est DIVINÆ ORDINATIONIS; origo nulla nec ipsius Primatus, nec modi, quo ad Romanam devenerit Ecclesiam, nisi SUPER TERRAM, & IN COELO monstratur.

§. XXIV. Additione tertia, velut qui jam perfunditus sis omni negotio, ac pœana tibi occinere possis, id unum laboras, ut intempestivum, si quis forte in legentium animis supersit, cuique cedendum potius, quam propositæ a te veritati potent, metum excurias. Nempe: "Nec terreat quemquam temporis lacuna, quæ primo sæculo & secundo intercessisset, donec Episcopus Romæ à majore ecclesiarum parte agnosceretur pro supremo Episcoporum & fidelium omnium Patre ac Pastore, quasi multos annos stetisset acephalus Christi grex sine Pastore omnium uno; cùm enim Christus quoad hoc præceptum particulare non dederit, ejusque semper nobiscum manens providentia suaviter hanc quoque rem disposuerit, necessum fuit tempus, ut successivè unirentur omnes particulares ecclesiæ *uni* *cuidam* præcellentiō & digniori, præsertim cùm nulla adesset revelatio divina, sed exspectandus esset rerum prosper successus, an Romæ stabiliter futura esset cum Episcopatu ecclesia. Quotiens autem Ecclesia nostra catholica non fuit, Deo sic permittente, sat multo tempore acephala?"

Cum

Cum pluribus id exemplis confirmasses ex PAPEBROCHIO, quæ necesse non est istib[us] a[di]scribi; " Addamus, inquis, hic pertinax schisma contra Urbanum VI., & ejus Successores, creatis horum Antipapis, quod dum avit ab an. 1378. usque ad annum 1417. Nonne his annis Ecclesia erat, aut verè, aut in effectu, acephala? sicut quoque tunc, cum federunt Papæ inutiles. arg. cap. 2. de translat. Episc., inutiles, inquam, sive propter vim majorem, quia ejecti aut captivi regere non potuerunt, vel quia requisita utilis Rectoris non habuerunt. Nequid repetam de incertitudine annorum, quot nempe Paparum quisque federit primis duobus saeculis." (s)

Cum pæana putas te hac ratione canere potuisse, Lectoris arbitrio relinquam ego, imo, quod principio faciebam, eruditii orbis appello sententiam, pro cuius parte victoria stet. Metus, quem eximere co[n]naris, qui mea hæc legerint, haud facile eximetur iis. Metuent, & jure merito, ne semel admissa ea temporis lacuna ad secundum usque se porrigitate saeculum, alias superveniat, teque longius progrediendi licentiam sibi adsumens, qui ad tertium, atque iterum audacior alias, qui ad quartum usque, & ad NICÆNI saltem tempora lacunam porrigidam existimet. Tueri etiam se poterit eo argumento, quod in Concilio CHALCEDONENSI act. 16. (t) cum PASCHASINUS Legatus dixisset, itaque recitasset Nicænum Canonem: *quod Ecclesia Romana semper habuit primatum*; hæc lectio sit rejicienda, quia non consona lectioni Græcorum, aliter eundem Canonem recitantium: Primatus autem, quem aliquando habuit Ecclesia Romana, intelligendus duntaxat sit de Primatu Patriarchico, sicut & cæterorum illic asserti Primatus nonnisi partim de hoc, partim de inferioribus aliis intelligi possunt; atque concludet, si quid amplius in NICÆNO Concilio visa sit obtinuisse Romanorum Ecclesia, id quidem esse *Primatum universale*, sed tunc denique illi concessum, & amplius roboratum per sequentia Concilia: atque huc trahi Chalcedonense effatum; hunc genuinum ipsius sensum esse, cum dicitur: *Antique Romæ Throno, QUOD URBS ILLA IMPERARET, jure PATRES (nempe in generalibus Conciliis congregati) privilegia TRIBUERUNT.* Exempla vero præcedentium Romæ Episcoporum, qui jamtum Sedi suæ

L 2

pote-

(s) pag. 45.

(t) apud Hard. Tom. II. Conc. col. 638.

potestatem super cæteras attribuerint, facile in *excessivum dominatum*,
 & quæ hujus sunt generis, detorquebit. Fiet tanto ille fidentior, ut
 hæc afferat, si legerit, quæ scribis Responso ad Censuram 7mam
 Ubiam Art. I. "Quid tunc juvabat (Sæc. X.) Ecclesiam, habuisse mon-
 stra Paparum? Nonne tunc Ecclesia seipsum suo pondere, & consilio
 sustentare debebat? A Papis enim nullum ei præsidium. Si hoc adju-
 vante Deo per UNUM Sæculum, quidni per DUO? Si per duo, quidni
 TRIA, & ULTERIORA? Quæ enim argumenta probant Ecclesiam
 per MILLE v.g. annos absque prædio Papæ non posse subsistere, ea-
 dem probabunt, quod neque per CENTUM, QUINQUAGINTA,
 QUINDECIM annos absque Papa certo, & idoneo possit subsistere."
 Hæc qui legit, confirmari posset per præcedentia, ubi quæreris: "an-
 non posset tota Italia cum statu Ecclesiastico subjugari ab immitti, &
 perpetuo hoste nostro Turca per injurias temporum? Ita ut Epi-
 scopatus Romanus extingueretur, sicut Patriarchatus Constantino-
 politanus; Quid tunc? An orbis Catholicus statim inveniret Se-
 dem Papalem commodam? Annon *integra sæcula* abire possent,
 per quæ concertarent variæ nationes pro ilthoc honore? Annon
 trecenti, sexcenti anni effluere possent, quin haberetur Papa?" O
 quam belle! Quidni audacissimus tunc deum aliquis emergat, qui
 dicat; *nos non egere Papa*. Siquid eximium præ cæteris Apostolis ha-
 buerit PETRUS, id vel *bonorem* merum fuisse (ut vult Jansenista Ano-
 nymus) vel cum eodem mortuo expirasse. (u) Hæc & similia sunt,
 quæ admissa semel *lacuna temporis* post D. PETRI obitum, eaque ad
 SECUNDUM porrecta sæculum, in hominum, qui vehementi pol-
 lent *imaginatione*, eaque magis, quam ratione utuntur, cerebrum
 haud ægre admodum *subintrare* possint, si forte non intrent illico, sed
 fœcunditatis accipiendæ, ac parturiendi certo concesso tempore. Et
 non terreatur Catholicus, ista dum non ad phantasie, sed rationis tru-
 tinam vocat? Non ita se res habet in *lacunis* temporum sero post ad-
 parentibus. Semel enim Primitu in Ecclesia Romana fixo, si quando
lacuna, eaque longior adparebit, hoc facile subibit mentem, Deum, qui
 Primum esse voluit perpetuum, id provisurum quoque, ut non ni-
 mis sero Ecclesia certum denique sibi, & indubitatum Pontificem ob-
 venisse gaudeat.

Præ-

(u) pag. 278.

Prætereo jam multa, quæ excipere possem adversus ea, quæ incidenter hic asseruntur: velut cum *majorem* modo Ecclesiarum partem sufficientem habes pro figendo Primitu, qui antea PLURIMARUM requirebas determinationem; cum ais, Christum non dedisse præceptum particulare, & quæ isthic sequuntur, in prioribus jam occupata satis; cum ratione pertinacis schismatis contra Urbanum VI. &c. ais *sub disjunctione* (tanquam si utrumque probabile membrum foret) aut vere, aut in effectu *Acephalam fuisse Ecclesiam*: cum demique argumentum ex Paparum inutilitate, & qui *requisita utilis Rectoris* non habuerint, depromis. Sufficiet, quem huic loco reservandum duxi, Heroem profecto, & imperterritum, quem plura non sternant VATICANA fulmina, opponere tibi JUSTINUM FEBRONIUM, illum inquam FEBRONIUM, qui, quidquid potuit, subsidiis undequaque corrasis, tum Romanæ Sedi, tum sedentibus in ea Pontificibus detrahere, salvo eo, quod Catholicus videretur, detraxit; qui, tibi per rimam tantum contuitus fuisset *lacunam temporis*, & ad SECUNDUM usque sæculum protensam, donec a PETRO primum fidelium omnium Patrem, & Pastorem accepisset Ecclesia, adeo non illa terrendus fuit, ut etiam longiorem oprasset; qui tamen non vidit illam, aut visam velut monstrum exhorruit, quod se Patre genitum, vel ex alio adoptatum, in lucem efferri erubesceret. Ipsummet audire juvat loquentem Lib. sing. cap. II. §. III. pag. 98. Editionis secundæ.

Quod autem inde a Petri Excessu, per continua non interrupta tempora hoc, de quo agimus, eminens Primatus officium non ab aliis, quam solis Romanis Praesulibus nunc cum justa, & legitima, nunc cum excessiva autoritate gestum, sed & in illis a Catholica Ecclesia respective agnatum fuerit, certum reddunt acta Conciliorum, gesta corundem Pontificum, denique Scripta, & Elogia Patrum tam Orientis, quam Occidentis." Audin? INDE A PETRI EXCESSU; ergo absque notabili mora: PER CONTINUA NON INTERRUPTA TEMPORA; ergo sine lacunis talibus, in quibus omni cum jure verus, & indubitatus sine Primitu foret Episcopus: EMINENS PRIMATUS OFFICIUM a ROMANIS PRÆSULIBUS, & quidem SOLIS, excessiva interdum cum autoritate (sed hoc nihil interest) reipsa tamen, & semper gestum agnoscit Magnus ille FEBRONIUS. Agnoscit,

L 3

sic

sic quoque Catholicam agnoscisse diversis temporibus Ecclesiam; nam
is, ut puto, sensus est hujus adverbii: *respective*. Agnoscit, utrum-
que hoc, quod scilicet & gestus semper INDE A PETRI EXCESSU
Primatus fuerit a ROMANIS PRÆSULIBUS, & gestum ab iis sem-
per CATHOLICA agnoverit ECCLESIA, CERTUM redi per
*acta Conciliorum, gesta Pontificum, Scripta, & Elogia Patrum tam Ori-
entis, quam Occidentis.* Ita tunc quidem FEBRONIUS. Sed quam
nunc illacrimetur sibi, quam doleat, non prius præisse JCTUM Tre-
vericum, ac viam monstrasse, qua non solum CLEMENTIS I. sed
plurium exinceps Romæ Episcoporum in jus trahi Primatus, quin &
negari valeat! Quam avide, si præisses, secururus fuit! Quam insu-
per multa ex Jansenistarum libris, ex quibus tam pingue suum reddi-
dit opus, ut pinguesceret eo magis, atque splendesceret, caute tamen,
ne fontes nominaret, additurus! Fortassis nunc etiam, quamvis se-
ras, habebit gratias, quod præiveris tandem: ac Duce te nactus,
Ducemque alium, quem aliquoties citavi, Jansenistam Anonymum,
& si quis interea prodibit, ejusdem factionis particeps, ubereum quarto
tomo suo materiam succrevisse lætabitur. Quid tunc non expectet
orbis? Novumne duntaxat aliquid, vel insolens, quale identidem
parturit Africa? An monstrum HORRENDOUM, INFOR-
ME, INGENS, quale non visum haec tenus?
Tempus dabit.



EPI-